

PREZIDENTE REPÚBLIKA PROMULGA TRANSFERENSIA EXTRAORDINÁRIA \$250 MILOENS HUSI FUNDU PETROLÍFERU

Palásiu Prezidensiál Nicolau Lobato, Díli, 7 abril 2020

Prezidente Repúblika promulga Dekretu Parlamentu Nasionál númeru 14/V kona-ba autorizasaun ba realizasaun transferénsia estraordinária husi Fundu Petrolíferu ho montante \$250 miloens.

Osan ho montante miloens \$250 sei utiliza ba prevensaun no kombat moras COVID-19, finansia Konta Jerál Tezouru no ba Parlamentu Nasionál atu dezenvolve polítika no programa iha ambitu prevensaun no kombat COVID-19.

Husi total orsamentu miloens \$250 ne'ebé aprova iha Parlamentu Nasionál, miloens \$150 sei aloka ba finansiametu medida prevensaun no kombat moras COVID-19 iha ámbitu Fundu COVID-19, miloens \$ 100 ba Konta Jerál Tezouru no \$500 mil ba Parlamentu Nasionál atu dezenvolve polítika no programa iha ámbitu prevensaun no kombat COVID-19.

Iha Kinta feira, 2 abril 2020, Parlamentu Nasionál aprova orsamentu \$250 miloens no iha loron tuirmai, Sesta feira 3 abril, haruka ba Prezidente Repúblika. Iha 6 abril, Prezidente Repúblika promulga Dekretu Parlamentu Nasionál.

Iha dekretu ne'e kria Fundu COVID-19 ne'ebé ho finalidade finansia despesas relaciona ho prevensaun no kombat moras ne'e. Osan husi Fundu ne'e sei utiliza ba sosa medikamentus, materiais no ekipamentu médiku, instalasaun no manuntensaun fatin sira ba kuarentena no izolamentu, formasaun no operasionalizaun profesionais envolve iha prevensaun no kombat moras COVID-19 no protesaun sosiál ba vítimas moras COVID-19.

Entidade ne'ebé sei responsabiliza ba Fundu mak Konsellu Jestaun ne'ebé sei jere husi membru Governu iha área finansas no saúde. Fundu COVID-19 sei regula husi Governu.

Finansiametu ba Konta Jerál Tezouru sei utiliza ba funsionamentu Administrasaun Públika no prestaun servisu mínimu ba protesaun sosiál, pagamentu pensoens no subvensaun públicas hanesan ba antigu Kombatente Libertasaun Nasionál, idozus no benefisiáriu husi Bolsa da Mãe.

MÍDIA PR